



Na temelju člana 162. Zakona o zdravstvenoj zaštiti FBiH, i člana 55. Statuta Ljekarske/Liječničke komore KS, Upravni odbor Ljekarske/Liječničke komore , donosi:

Pravilnik o postupku i načinu davanja mišljenja o opravdanosti osnivanja privatne prakse i privatne zdravstvene ustanove

Opće odredbe

Član 1.

Ovim Pravilnikom uređuje se postupak i način davanja mišljenja o opravdanosti osnivanja privatne prakse i privatne zdravstvene ustanove (dalje u tekstu: davalac zdravstvenih usluga) Ovim Pravilnikom uređuje se i postupak i način davanja mišljenja o proširenju ili promjeni djelatnosti, odnosno promjeni sjedišta davalaca zdravstvenih usluga kao i dopunskom radu davalaca zdravstvenih usluga.

Nadležna tijela

Član 2.

Odbor za stručna i staleška pitanja odlučuju o zahtjevima za davanje mišljenja iz člana 1. ovog Pravilnika (dalje u tekstu: zahtjev).

Član 3.

Odbor za stručna i staleška pitanja odlučuje o zahtjevu stranke koji se odnosi na davanje zdravstvenih usluga .

Postupak

Član 4.

Davalac zdravstvenih usluga zahtjev podnosi u pisanom obliku. Zahtjev mora sadržavati sljedeće elemente:

- ime i prezime osnivača;
- broj odobrenja za samostalan rad (licenca);
- uredno reguliran članski status;
- adresu osnivača;
- naziv davalaca zdravstvenih usluga;
- mjesto i adresu davalaca zdravstvenih usluga;
- djelatnosti davalaca zdravstvenih usluga;
- opis dijagnostičkih i terapijskih zahvata koje će obavljati davalac zdravstvenih usluga te
- prijedlog akta o osnivanju davalaca zdravstvenih usluga.

Član 5.

U postupku donošenja mišljenja iz članka 1. ovog Pravilnika, Odbor za stručna i staleška pitanja može, ako ocijeni potrebnim, zatražiti od osnivača da dostavi dodatnu dokumentaciju vezanu uz postupak osnivanja davalaca zdravstvenih usluga, proširenju ili promjeni djelatnosti pored dokumentacije navedene u prethodnom članu ovog Pravilnika.

Član 6.

Odbor za stručna i staleška pitanja iz ovoga Pravilnika dužan je donijeti mišljenje najkasnije u roku od 60 dana od primitka urednog zahtjeva u smislu odredbe člana 4 i 5. ovog Pravilnika.

Dopunski rad

Član 7.

U postupku donošenja mišljenja o opravdanosti obavljanja dopunskog rada zdravstvenih radnika koji ispunjavaju uslove propisane Zakonom o zdravstvenoj zaštiti („Službene novine Federacije BiH“ broj 46/10) Odbor za stručna i staleška pitanja se rukovodi slijedećim kriterijima shodno Pravilniku o načinu, postupku i uvjetima kao i drugim pitanjima od značaja za obavljanje dopunskog rada („Službene novine Federacije Bosne i Hercegovine br. 60/12“):

- poslove u svojoj struci dopunskim radom obavljaju zdravstveni radnici sa završenim medicinskim, stomatološkim, farmaceutskim, farmaceutsko-biohemijskim fakultetom, koji su specijalisti i imaju najmanje deset godina radnog staža u zvanju specijaliste.

- izuzetno od predhodnog stava ovog člana, poslove u svojoj struci dopunskim radom mogu obavljati zdravstveni radnici sa medicinskim, stomatološkim, farmaceutskim, farmaceutsko-biohemijskim fakultetom, specijalisti s magisterijem ili doktoratom iz medicinskih stomatoloških ili farmaceutskih nauka i bez posjedovanja deset godina radnog staža u zvanju specijaliste.

- Mišljenje komisije poslodavca (shodno zakonu o Zdravstvenoj zaštiti član.183)

- Izjava kojom se ljekar obavezuje da će potpisati ugovor za dopunski rad samo sa jednim

poslodavcem (shodno zakonu o Zdravstvenoj zaštiti član 184.)

- dokaz o plaćenju članarini

Troškovi postupka

Član 8.

Podnositelj zahtjeva iz člana 1. ovog Pravilnika dužan je za troškove postupka platiti propisani iznos.

Visinu iznosa iz stava 1. ovoga člana posebnom odlukom utvrđuje Upravni odbor Ljekarske/Liječničke komore KS.

Način davanja mišljenja o opravdanosti osnivanja, proširenju ili promjeni djelatnosti te promjeni sjedišta

Član 9.

U postupku donošenja mišljenja o opravdanosti zahtjeva koji se odnosi na davalaca zdravstvenih usluga Odbor za stručna i staleška pitanja se rukovodi slijedećim kriterijima:

- gravitirajući broj stanovnika i zdravstveno osiguranih osoba;

- demografske karakteristike stanovnika (dob, spol);

- karakteristike pojedinih područja (naseljenost, prometna povezanost, demografski ugrožena područja te posebni uslovi rada zbog povećanog broja stanovnika tijekom turističke sezone) te utjecaj okoliša na zdravlje stanovništva;

- postojeći obim zastupljenosti djelatnosti za koju je zahtjev podnesen na području na kojem se traži otvaranje privatne prakse.

Osim kriterija navedenih u stavu 1. ovog člana, Odbor za stručna i staleška pitanja koja sudjeluju u postupku davanja mišljenja može, ovisno o okolnostima svakog pojedinog zahtjeva, uzeti u obzir i druge kriterije, shodno mjerilima koja su propisana Planom zdravstvene zaštite KS.

Završne odredbe

Član 10.

Izmjene i dopune ovog Pravilnika donose se po postupku za donošenje Pravilnika.

Ovaj Pravilnik stupa na snagu danom donošenja.

PREDSJEDNIK UPRAVNOG ODBORA

Dr Anisa Bajramović